

## Tegemeo Thabiti kwa Yesu

*Basi Mungu wa tumaini na awajaze ninyi furaha yote na amani katika kuamini, mpate kuzidi sana kuwa na tumaini, katika nguvu za Robo Mtakatifu—Warumi 15:13.*

**W**akati fulani ufahamu wa kina wa kutostahili kwetu utaleta mguso wa kutisha katika nafsi; lakini hili sio uthibitisho kwamba Mungu amebadilika kwetu au sisi kwa Mungu.... Tunapaswa kuushika mkono wa Yesu kwa imani na kumwamini kikamilifu nuruni sawa sawa na gizani.

Shetani anaweza kunong'ona, "wewe ni mwenye dhambi mno kiasi cha kutostahili kuokolewa na Kristo." Wakati ambapo unakiri kwamba wewe u mwenye dhambi na asiyestahili kweli kweli, unaweza kukabiliana na mjaribu kwa sauti kubwa, "Kwa nguvu ya upatanisho, ninamtambua Kristo kuwa Mwokozi wangu. Sitegemei wema wangu, bali kwa damu ya thamani ya Yesu, inayonitakasa. Wakati huu ninaiweka nafsi yangu isiyojiweza kwa Kristo." Maisha ya Mkristo yanapaswa kuwa maisha ya imani iliyo hai daima. Imani isiyoshindwa, tumaini thabiti kwa Yesu, litaleta amani na uhakika nafsini....

Kila kikwazo, kila adui wa ndani, anaongeza tu uhitaji wako kwa Kristo. Alikuwa kuuondoa moyo wa jiwe na kukupatia moyo wa nyama. Mtumainie Yeye kwa ajili ya kupata neema maalum ili uweze kuyashinda makosa yako ya pekee. Unaposhambuliwa na majaribu, kwa uaminifu uvipinge vishawishi vya uovu; iambie nafsi yako, "Ninawezaje kumkosea heshima Mkombozi wangu? Nimejisalimisha mwenyewe kwa Yesu; siwezi kuzifanya kazi za Shetani." Mlilie Mwokozi mpendwa kwa ajili ya msaada ili uangamize kila sanamu na kuiacha kila dhambi uipendayo. Hebu jicho la imani limwone Yesu akiwa amesimama mbele ya kiti cha enzi cha Baba, akionesha mikono Yake iliyojeruhiwa anapoomba kwa ajili yako. Amini kwamba unapata nguvu kutoka kwa Mwokozi wako wa thamani.

Kwa imani zitazamie taji zilizowekwa kwa ajili ya wale ambao watashinda; usikilize wimbo wa furaha wa waliokombolewa, Anastahili Anastahili MwanaKondoo aliyechinjwa na ametukomboa kwa ajili ya Mungu! Jaribu kuyaona mandhari haya kuwa ni halisi. Stefano, mfia dini wa kwanza, katika pambano lake la kutisha dhidi ya falme na mamlaka, juu ya majeshi ya pepo wabaya katika ulimwengu wa roho, alitamka, "Tazama! Naona mbingu zimefunguka, na Mwana wa Adamu amesimama mkono wa kuume wa Mungu." Mwokozi wa ulimwengu alifunuliwa kwake akiwa anaangalia chini kutoka mbinguni juu yake kwa shauku ya kina kabisa; na nuru tukufu ya utulivu wa Kristo iling'aa usoni mwa Stefano kwa mwangaza mwingi kiasi kwamba hata adui zake waliona uso wake uking'aa kama uso wa malaika.

Ikiwa tutaruhusu akili zetu kumtafakari Yesu zaidi na ulimwengu wa mbinguni, tutapata kichocheo na msaada wenye nguvu katika kupambana mapambano ya Bwana. Kiburi na kuupenda ulimwengu vitapoteza uwezo wao kadiri tunapokuwa tukitafakari utukufu wa nchi ile nzuri ambayo hivi punde itakuwa makazi yetu. Karibu na uzuri wa Yesu, mivuto yote ya kidunia itaonekana kutokuwa ya thamani (The Review and Herald, Novemba 15, 1887).